



STINAPA TA INFORMA

HISTORIA DI E PARKE SUPMARINO – PARTI 1

Boneiru tin un historia riku pa lokual ta e protekshon di e bida di bou di awa. I nos por ta hopi orguyoso di esei. Grásias na e vishon di protekshon di naturalesa i gobernantenan di e tempu ei, awor nos por probechá di turismo di buseo i lokual laman tin pa ofresé nos. I esaki ta loke ta e idea di 'desaroyo duradero'. Poblashon di awor tin probecho di reglanan ku a ser imponé dor di generashonnan promé ku nos. I nos tambe tin e deber ei na nos yunan i nan yunan. Ya ta mas ku 45 aña pasá, na 1961, ku a bin prohibishon pa strobamentu di turtuga i kohementu di nan webunan. 10 aña despues a sigui e prohibishon pa tiramentu di piská ku harpun. Na 1975 koral a haña protekshon. Final di añanan 70 a kuminsá desaroyá Parke Marino Boneiru. Un trabou ku a finalisá na 1984. E proyekto ta un bon ehèmpel di koperashon. Koperashon entre komersiantenan den industria di buseo, organisashonnan di protekshon di naturalesa i gobièrnu. E partidonan aki ainda ta hunga un ròl di importansha den maneho di e parke di bou di laman. Na komienso di Bonaire Marine Park dos persona ku a hunga un ròl importante tabata Captain Don i Carel Steensma (un direktor di KLM i amigu personal di Prens Bernhard, presidente e tempu ei di WNF). Tambe Wereld Natuur Fonds - Nederland, Stichting Nationale Parken Nederlandse Antillen i gobièrnu di Antia i Boneiru tabata hopi embolbí. Ta den e promé periodo aki a kuminsá pone e promé buinan pa mara boto di buseo. No tabata un trabou fásil. Pero ku un tiki koperashon bo por yega hopi leu na Boneiru. WEB a fasilidá e drùmsnan bashí pa traha e blòkinan pa ankra. Empleadonan di STINAPA i boluntarionan tabata pone heru i betòn den e drùmsnan pa despues ku un boto ku BOPEC a fasilidá a baha nan na laman ku un kran. Protekshon di e bida bou di laman pa medio di ponementu di blòki pa mara boto tabata algu nobo. Boneiru a haña rekonosimentu mundial inmediato komo lider den maneho di medioambiente marino. Na 1984 gobièrnu a bolbe duna un man i a imponé legislashon protektivo. Pero ainda no ta tur problema a keda resolvé. Pasobra mas ku klaro tabatin mester di plaka pa manehá e parke supmarino. I ta plaka no tabatin. Asina a kuminsá un periodo difísil den e bida hóben di e parke supmarino. Ta kon Bonaire Marine Park a sobreviví e añanan difísil ei, nos lo konta próksimo biaha. Pa mas informashon wak: <http://www.bmp.org/history.html>

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALES



Traha huntu na un desaroyo duradero pa Boneiru